

Na osnovu člana 7. stav 6. Zakona o privrednim društvima ("Službene novine Federacije BiH", br. 23/99, 45/00, 2/02, 6/02 – Isp., 29/03, 68/05, 91/07, 84/08, 88/08 – Isp., 7/09 – Isp., 63/10 i 75/13), federalni ministar poljoprivrede, vodoprivrede i šumarstva, donosi

P R A V I L N I K **O MINIMALNIM TEHNIČKO-TEHNOLOŠKIM I KADROVSKIM USLOVIMA** **ZA PROIZVODNJU RAKIJA I VOĆNIH VINA**

I OPĆE ODREDBE

Član 1.

Ovim Pravilnikom propisuju se minimalni tehničko-tehnološki i kadrovski uslovi za proizvodnju rakija i voćnih vina u pogledu prostora, opreme i stručnog kadra, vođenje evidencija, postupak utvrđivanja ispunjavanja propisanih uslova i izdavanja rješenja o ispunjavanju istih, te postupak izdavanja rješenja o puštanju u promet rakija i voćnih vina na teritoriji Federacije Bosne i Hercegovine.

II MINIMALNI TEHNIČKO-TEHNOLOŠKI I KADROVSKI USLOVI

1. Proizvodnja i promet rakija i voćnih vina

Član 2.

- (1) Proizvodnju rakija i voćnih vina radi stavljanja u promet mogu vršiti proizvođači koji u pogledu prostora, opreme i stručnog kadra ispunjavaju minimalne tehničko-tehnološke i kadrovske uslove propisane ovim Pravilnikom i koji su upisani u Registar poljoprivrednih gazdinstava (u daljem tekstu: Registar).
- (2) Upis u Registar vrši se u skladu sa odredbama Pravilnika u upisu u Registar poljoprivrednih gazdinstava i registar klijenata („Službene novine Federacije BiH“, broj 42/08).
- (3) Prijava za upis u Registar proizvođača koji se bave proizvodnjom rakija i voćnih vina (u daljem tekstu: proizvođač) sadrži:
 - podatke o proizvođaču: ime, prezime, adresa, JMB za fizička lica, odnosno naziv, sjedište, adresa, šifra djelatnosti, porezni identifikacijski broj za pravna lica i obrtnike,
 - podatke o vinogradima i voćnjacima: općina, katastarska općina, broj katastarske parcele, podaci o pravu korištenja zemljišta - vlasništvo, posjed, zakup ili koncesija, površina voćnjaka ili vinograda, godina sadnje, sorta, broj i prinos.
 - po potrebi i ostale podatke.

Član 3.

Proizvođači koji se bave proizvodnjom rakija i voćnih vina radi stavljanja u promet moraju imati:

- a) prostor za prijem i preradu sirovine (grožđa i voća), kao i odgovarajući prostor za proizvodnju, njegu i čuvanje gotovih proizvoda (rakija i voćnih vina);
- b) opremu i odgovarajuće uređaje;
- c) stručni kadar.

Član 4.

Proizvođač mora obezbijediti kontrolu kvalitete sirovine za proizvodnju rakija i voćnih vina i gotovog proizvoda putem vlastite laboratorije koja je ovlaštena ili od strane druge laboratorije sa kojom je zaključio pismeni ugovor, a koja je ovlaštena za kontrolu kvaliteta alkoholnih pića.

Član 5.

Rakije i voćna vina se mogu stavljati u promet samo u originalnom pakovanju.

2. Prostorni uslovi

Član 6.

- (1) U postupku proizvodnje rakije pod odgovarajućim prostorom, proizvođač rakije mora imati prostor za:
 - a) prijem i preradu sirovine za proizvodnju rakije u kljuk i za vrenje,
 - b) destilaciju, doradu, njegu,
 - c) smještaj, čuvanje i manipulaciju rakije.
- (2) U postupku proizvodnje voćnih vina pod odgovarajućim prostorom iz člana 3. ovog Pravilnika, proizvođač voćnih vina mora imati prostor za:
 - a) prijem i preradu sirovine za proizvodnju voćnih vina,
 - b) vrenje voćne pulpe,
 - c) doradu, njegu i čuvanje vina.
- (3) Proizvođači koji pune rakiju i voćna vina u boce moraju, osim prostora iz st. (1) i (2) ovog člana, imati i poseban prostor za pranje boca i punjenje proizvoda u boce, te poseban prostor za skladištenje.

Član 7.

- (1) Prostori iz člana 6. st. (1) i (2) ovog Pravilnika, moraju imati obezbjeđenu zdravstveno ispravnu vodu. Ako se proizvodni pogon snabdijeva vodom iz sopstvenog bunara, kaptaze ili rezervoara, proizvođač je dužan obezbijediti dokaz o higijenskoj ispravnosti vode.
- (2) Podovi i zidovi prostorija objekta moraju biti izrađeni od materijala koji se može lako čistiti i prati.
- (3) Podovi proizvodnog pogona trebaju imati odgovarajući pad prema odvodnim kanalima (slivnicima) sa rešetkama za sprečavanje prolaska čvrstog otpadnog materijala i onemogućava zadržavanje vode na površini poda.
- (4) Otpadne vode se odводе u kanalizacionu mrežu, odnosno adekvatnu septičku jamu.
- (5) U proizvodnom pogonu mora biti obezbljeđena odgovarajuća temperatura, vlažnost i ventilacija.

(6) Sredstva za čišćenje i dezinfekciju ne smiju se držati u proizvodnom pogonu.

3. Oprema

Član 8.

- (1) Pod odgovarajućom opremom i uređajima iz člana 3. tačka b) ovog Pravilnika podrazumijevaju se oprema i uređaji u skladu sa tehnologijom proizvodnje rakije i voćnih vina.
- (2) Oprema i uređaji koji se koriste u proizvodnji rakija i voćnih vina treba da se održavaju u ispravnom stanju i da budu izrađeni od čvrstog, neporoznog, neapsorbirajućeg materijala koji je otporan na koroziju i koji ne stupa u reakciju sa bilo kojim sastojkom u procesu proizvodnje ili sredstvom za pranje i dezinfekciju.

4. Kadrovski uslovi

Član 9.

- (1) Proizvođač, registrovan kao pravno lice mora imati stalno uposleno lice koja ima završen viši ili visoki stepen školske spreme iz oblasti vinogradarstva ili vinarstva, poljoprivredni fakultet voćarsko-vinogradarskog smjera, agronomski fakultet voćarsko-vinogradarskovinarskog smjera ili prehrambeno-tehnološki fakultet odsjeka tehnologije prehrambenih proizvoda.
- (2) Proizvođač, registrovan kao fizičko lice mora imati završenu najmanje srednju poljoprivrednu školu vinogradarsko-vinarskog ili prehrambeno-tehnološkog smjera ili imati osobu angažovanu na osnovu ugovora o djelu koja ispunjava navedene uslove i odgovorna je za proces proizvodnje.

III NAČIN I POSTUPAK IZDAVANJA RJEŠENJA O ISPUNJAVANJU USLOVA ZA PROIZVODNJU RAKIJA I VOĆNIH VINA

Član 10.

- (1) Zahtjev za izdavanje rješenja o ispunjavanju minimalnih tehničko-tehnoloških uslova za proizvodnju rakija i voćnih vina, proizvođač podnosi općinskom organu nadležnom za poslove poljoprivrede (u daljem tekstu: nadležni općinski organ).
- (2) Uz zahtjev proizvođač je dužan dostaviti opis tehnološkog postupka za dobijanje rakija i voćnih vina i podatke propisane čl. 3 i 6. ovog Pravilnika.
- (3) Ispunjavanje uslova propisanih ovim Pravilnikom, najkasnije u roku od 30 dana od dana podnošenja zahtjeva, utvrđuje stručna Komisija koju imenuje nadležni općinski organ (u daljem tekstu: Komisija).
- (4) Komisija se sastoji od tri člana i uvidom na licu mjesta zapisnički konstatuje ispunjenost minimalnih tehničko-tehnoloških i kadrovskih uslova za obavljanje djelatnosti proizvodnje rakija i voćnih vina.
- (5) Na osnovu zapisnika i mišljenja Komisije, nadležni općinski organ, donosi rješenje o ispunjavanju minimalnih tehničko-tehnoloških i kadrovskih uslova za proizvodnju rakija i voćnih vina te po jedan primjerak rješenja dostavlja Federalnom ministarstvu poljoprivrede, vodoprivrede i šumarstva i nadležnom kantonalnom ministarstvu.

Član 11.

- (1) Rok važenja Rješenja iz člana 10. stav (5) ovog Pravilnika je do donošenja odgovarajućeg propisa o rakiji i voćnim vinima.
- (2) Proizvođač se ne može baviti proizvodnjom bez Rješenja iz stava (1) ovog člana, a svaku promjenu vezanu za djelatnost koju obavlja dužan je prijaviti nadležnom općinskom organu, najkasnije 30 dana od dana nastale promjene.

IV RJEŠENJE ZA PUŠTANJE RAKIJA I VOĆNIH VINA U PROMET

Član 12.

- (1) Zahtjev za izdavanje Rješenja o puštanju rakija i voćnih vina u promet proizvođač podnosi nadležnom općinskom organu.
- (2) Uz zahtjev za izdavanje rješenja iz stava (1) ovog člana, proizvođač je dužan dostaviti i slijedeću dokumentaciju:
 - podatke o proizvedenim količinama rakije i voćnih vina koje se stavljaju u promet,
 - izvještaj o kontroli kvalitete rakije voćnih vina, izdat od institucije ovlaštene za kontrolu kvaliteta alkoholnih pića i
 - kopiju Rješenja iz člana 10. stav (5) ovoga Pravilnika.

V EVIDENCIJE

Član 13.

- (1) Proizvođači rakija i voćnih vina su dužni voditi evidencije o:
 - a) proizvodnji voća, grožđa, rakije i voćnih vina,
 - b) prometu rakije i voćnih vina,
 - c) zalihama rakije i voćnih vina
- (2) Evidencije iz stava (1) ovoga člana vode se na obrascima 1., 2. i 3. koji se nalaze u prilogu ovoga Pravilnika i čine njegov sastavni dio
- (3) Sumiranje podataka vrši se sa stanjem na dan 31.12. tekuće godine.

VI PRIJELAZNE I ZAVRŠNE ODREDBE

Član 14.

- (1) Proizvođači rakija i voćnih vina, osim uslova propisanih ovim Pravilnikom, moraju udovoljavati i drugim propisima koji se odnose na obavljanje ove djelatnosti i to: Zakon o akcizama u Bosni i Hercegovini („Službeni glasnik BiH“, broj: 49/09) i provedbeni propisi doneseni na osnovu ovog Zakona, Pravilnik o kvalitetu voćnih vina i Pravilnik o definisanju, opisivanju,

prezentovanju, označavanju i zaštiti geografskih oznaka jakih alkoholnih pića („Službeni glasnik BiH“, broj:81/12).

- (2) Proizvođači rakija i voćnih vina su dužni uskladiti svoje poslovanje sa odredbama ovog Pravilnika najkasnije u roku od 6 mjeseci od dana stupanja na snagu ovog Pravilnika.

Član 15.

Ovaj Pravilnik stupa na snagu narednog dana od dana objavljivanja u „Službenim novinama Federacije BiH“.

MINISTAR

Jerko Ivanković-Lijanović

Broj:03-4-18/1-3359-1/13
Sarajevo, 25.12.2013.godine

Obrazac 1.**EVIDENCIJA O PROIZVODNJI VOĆA, GROŽĐA, RAKIJE I VOĆNIH VINA**

Proizvođač rakija / voćnih vina (Ime i prezime / naziv pravnog lica) _____

Adresa _____

Broj iz Registra gazdinstava i klijenata _____

Mjesto, datum _____

Redni broj	Broj, datum i naziv dokumenta o proizvodnji voća / grožđa	Broj, datum i naziv dokumenta o kupovini voća / grožđa	Proizvodnja voća / grožđa					Proizvedeno rakije/voćnih vina		Napomena
			Vrsta i sorta	Površina u ha	Broj rodni stabala	Količina u kg	Datum	Naziv proizvoda	Količina u litrima	

Potpis (i pečat za pravna lica i obrtnike) proizvođača

Obrazac 2.

EVIDENCIJA O PROMETU RAKIJE I VOĆNIH VINA

Proizvođač rakija / voćnih vina (Ime i prezime / naziv pravnog lica) _____

Adresa _____

Broj iz Registra gazdinstava i klijenata _____

Mjesto, datum _____

Redni broj	Ime i prezime, adresa / naziv i sjedište kupca	Naziv proizvoda	Broj i datum dokumenta o prodaji proizvoda	Količina prodatog proizvoda u litrima	Količina alkohola (vol %)	Vrsta pakovanja	Prodaja u rinfuznom stanju u litrima	Datum prodaje	Napomena

Potpis (i pečat za pravna lica i obrtnike) proizvođača

Obrazac 3.

EVIDENCIJA O ZALIHAMA RAKIJE I VOĆNIH VINA NA DAN 31.12.20____.

Proizvođač rakija / voćnih vina (Ime i prezime / naziv pravnog lica) _____

Adresa _____

Broj iz Registra gazdinstava i klijenata _____

Mjesto, datum _____

Redni broj	Naziv proizvoda	Količina proizvoda u litrima	Količina alkohola u vol. %	Vrsta pakovanja	Napomena

Potpis (i pečat za pravna lica i obrtnike) proizvođača